




C'EST DES III MORS ET DES III VIS.



OMPAINS, vois tu ce
[que je voi ?
« A pou que je ne
[me desvoi.
« De grant paour le
[cuers me tramble

« Vois-tu là ces trois mors ensamble,
« Com il sont hideus et divers
« Et pourri et mengié de vers.
« Teles devenront nos jouventes ;
« De tel marchié aurons tès ventes
« Qui nous vint de no premier pere ;
« Car chascuns qui naist le compere ;
« Car tuit en suefrent la mort sure
« Et après des vers la morsure,





« Qui en l'ame ne met conroi.
« Conte, ne duc, prince, ne roi
« N'auront deport ne que ribaut ;
« Car jamais ne seront ribaut ,
« Puis k'en tenebres seront mis
« D'enfer, où tout bien sont remis. »

*Remis i sont deduit, solaz ;
Meschéans pris i est au laz ;
Chéans est bien qui jà n'est mis ;
Mis n'est là qui bien est chéans ;
Au laz i est pris meschéans ;
Solaz, deduit i sont remis.*

Li secons vis dist : « J'ai envie
« Biaux compains, d'amender ma vie ;
« Trop ai fait de mes volentés.
« Or est mes cuers entalentés
« De faire tant que m'ame acorde
« Au douz roi de miséricorde ;
« Car mes cors n'est fors c'une paille.
« Ce puis-je bien véoir sans faille



« Par ces monstres là aparans,
« K'en tel point serai-je parans
« Quant Mors me ferra de sa faus.
« Faucons, ne chiens, ostoirs, gerfaus,
« Les grans sales ne les grans tours
« Ne puet la Mort tolir ses tours
« Que ne preigne tout à delivre
« L'omme, quant il cuide miex vivre;
« Ne ne puet on le jour savoir
« Que la Mors le volra avoir. »



*Avoir la mors veut tout au fort ;
Nus qui vive n'en a confort ;
Nus vient et s'en va sans avoir ;
Sans avoir s'en va et vient nus ;
Confort n'en a qui vive nus ;
Au fort tout veut la mort avoir.*



Li tiers vis, qui estraint ses mains,
Dist : « Pourquoi fu fais hom humains,
« Puis qu'il doit recevoir tel perte?
« Ce fu folie trop aperte,



« Se folie fist oncques Diex.
 « Courtes joies et si grans diex
 « En ce chaitif monde par a,
 « Fors seulement que Diex para
 « Home seur toute créature,
 « Quant le forma à sa figure
 « Et qu'il péüst faire sans plait
 « Bien et mal, lequel qu'il li plaist.
 « Or se gart très bien à l'emprise
 « Que tel voie soit par lui prise
 « Que devant Dieu n'en soit repris.
 « Car, s'il est à mal faire pris
 « Sans repentance, au jugement
 « Iert jugiés où juges ne ment. »
Ne ment mie juges si fais ;
Véoir set de chascun les fais ;
Séoir fera droit jugement ;
Jugement droit fera séoir ;
Les fais de chascun set véoir ;
Si fais juges mie ne ment.





Li premiers mors dist : « Damoiseil
« N'oubliés pas, pour cel oisel
« Ne pour vos robes à orfrois,
« K'en terre gerra chascuns frois;
« Là pourrira vo chars humaine.
« Or gardés bien que ne vous maine
« Vos grans deduis et vos solas
« Là on prent les ames au las
« El grief torment, qui tous tans dure,
« Pour vo cors qui n'est fors c'ordure;
« Ce povés vous par nous véoir.
« Or vous doint Diex bien porvéoir;
« Car par nous avés bien véu
« Que vos cors seront porvéu
« En orde et en puant prison
« Et si ne fu onques nus hon
« C'on truisse qui en fust delivres
« En kan k'avés véu de livres. »



*Véu moult en livres avons ;
La mort eschiver ne savons ;
La mors tolt qui a porvéu ;*



*Porvéu qui a tolt la mors ;
Ne savons eschiver la mort ;
Avons en livres moult véu.*

« Seigneurs, » ce dist li secons mors,
« Il est vérités que la mors
« Nous a fais itès com nous sommes,
« Et vous porteres itès sommes.
« N'i aura si pur ni si fin.
« Or porvéés devant la fin
« Que les ames aient repos.
« Quant en terre serés repos,
« N'avez ami, tant vous ait chier,
« Qui jamais vous quiere à touchier ;
« N'emporterés fors que bien fait
« De kan k'aurés au monde fait.
« Se bien vous volés regarder
« D'orgueill vous devriés garder ;
« En nous poés prendre exemplaire
« Qui durement vous devoit plaire,
« Dont vous vaurriés miex à l'âme ;





« Car li cors pourrira souz lame. »
L'ame cors le pourri acuevre ;
Diex si rendra le droit de l'uevre ;
Diex doit avoir qui perdra l'âme ;
Qui perdra l'ame avoir doit Diex ;
De l'uevre le droit rendra Diex ;
Acuevre le porri cors l'ame.



Li tiers mors dist qu'il est sechiés :
« Je sui de mon lignage chiés,
« Princes et rois et connestables,
« Biaux et riches, joians metables ;
« Or sui si hideus et si nus
« Que véoir ne me daigne nus.
« Il ne m'est remès que les os,
« Et pour itant dire vous os
« Que mar vit li hons en ce monde
« S'il ne fait l'ame nete et monde.
« Cors est au monde le deduis,
« Dont on est en enfer conduis ;
« S'a à l'entrée grant destrece





« Et à l'issue grant asprece.
« Je ne vous sais miex préechier ;
« Monstre chascuns com il s'a chier ;
« Cui il souviendra bien d'amer,
« Pechiés nel'porra entamer. »
*Amer doit s'ame sages hom ;
Mieudres tresors n'est pas raison ;
Ors cors plus n'as à reclaimer ;
A reclaimer n'as plus cors ors ;
Par raison n'est mieudres trésors ;
Hon sages s'ame doit garder.*

Explicit des iij mors et des trois vis.

